



Орган Лемковского Союза.

Выходит в каждый четверг.

Редакция и администрация в Крынице. — Адрес „Лемко” Крыница.

Всіх читателей, котры не вплатили ище пренумераты, просиме выровнати якнайскорше рахунки.

Полезна работа.

Лемко-Союз в Горлицах основано не в политичных ціях, лем пото, штобы поднести наш народ просвітительно и господарчо. Уважаме, же оден сад, заложенный в яком нибудь селі, оден кооператив, оден sklep, одна молочарня, одна читальня, одна образцова гнозвня, оден залісений жбырк, або одно осушене багно дают нам значно большу користь, як сто политичных собрань, на котрых робит ся много шуму и вітру и ухвалят ся моц резолюций, знаючи уж наперед, же жадна с них не буде переведена.

Тому и работа Лемко Союза ест мозольна и тяжка. Она не може нагло перевернути, як то гварят, світ до горы ногами и похвалити ся епоковима винаходами, бо особенно трудно ест перекопати людей о том, же тото все, до чого привыкли они от дітинства, ест уж тепер перестаріле и што треба доконче змінити радикально способы нашої господарки, бо иначе світ и наши сусіды нас випередят и мы мусиме пропасти.

Однак в том тяжком труді видиме уж тепер гдакади добры результаты, котры свідчат о полезности нашої работы и котрых вагы не зможе ослабити аж и найзавзятійши наш ворог.

Таким фактом ест отбудова дороги в сяноцком повіті на пространстві 13 км. меже Буковском и Вислоком Великим. Як выглядала тота дорога перед днем 26. мая т. р., знают всі, кому приходило ся ити або їхати с Буковска до Вислока Великого. Самы багна, баюры и выбои, глубоки нераз понад 1½ метра. Выстарчит сказати, што на той дорозі сыпано в часі работы до одной баюры 20 и больше фур камня, штобы представити собі, як выглядала тота правдиво лемковска дорога.

Аж дня 26. мая т. р. о год. 6-ой рано собрало ся в Буковску понад 2000 людей с мотыками, лопатами и рыскалями и 686

фурманок. Штож то за свято, што за нагода скликала ту такую масу людей и воев? То свідомы своего добра и обовязку честны жителі Вислока Долічного, Вислока Горішного, Волі Петровой и Буковска собрали ся ту на велике святс „День Труда”, собрали ся не на забаву, не на праздник, а по то, штобы лучшим трудом поправити и отбудовати дорогу Буковско-Вислок Великий.

И приступлено до работы под руководством техничного персонала, присланого Пов. Выділом с Сянока. Люды ровняли терен, другы копали фосы, а фуры звозили камень и засыпали багна. Через оден день зробили они лучшим усилим перешло половину дороги, то ест около 7 км. Вартость той работы выносит перешло 10.000 зл. В работі приняли участь также всі судовы урядники с Буковска, а начальник суда Д-р Турский дал прекрасный примір, робячи цілый день лопатом. В работі помагали также всі місцевы организации, а также школьны діти, котры малыми рученятами гребали и ровняли выхылистый терен.

Радость расперала сердца зрітелей, видячи поступ той дороги, котра до тепер была одним багном — одним трясависком. Коло год. 5-той по полудни приіхал сяноцкий староста Буцьор, нач. дор. выділа инж. Баранцевич, школьный инспектор Голембьовский, начальник скарбого уряда Брандт, посол Моравский с женом и священник с Вислока о. Голойда.

Староста подяковал организаторам и всім потрудившим ся при той дорозі за пожертвованный, безкористный труд для добра своих громад и державы.

Кто организовал тот „День Труда”

Копи в Польщі повставали штотаз новши свята, як свято матери, ліса, ошадности коня и инши, поддал гр. Йоан Потоцкий, властитель Рыманова-Здрою, заслуженый

общественный діятель, идею истроивати также т. зв. „День Труда” полягающий на том, што люды даной окрестности жертвуют оден день в році свой труд для загального добра.

Идея тота приняла ся и гр. Потоцкий уж в попередных літах побудовал таким способом много дорог в цілой Галичині. Идея тота сподобала ся и Лемко-Союзу и тот занял ся пропагованем ей в кругу своей територии, а член правления Лемко-Союза, нотар с Буковска г-н Лев Яворский потрафил своим трудом и впливами замінити тоту идею в діло. В той ціли заохочал он до той работы приходивших к нему за справами людей, а также устроил ряд собрань в обох Вислоках, Волі Петровской и Буковску и с’уміл перекопати населені о полезности той работы. В миг поняли его полезны стараня О. Голойда, лат. сваяч. Маевский, дыр. школы Домбровский, Кудлач и Малый с Вислока, Стефан Пітух, солтыс с Волі Петровой, Позняк, войт с Буковска, Дурачинский, солтыс с Буковска Ст. Ковалик и другы міщане и селяне и помогли г-ну Яворскому в урядженю того полезного свята. День тот, пожертвованный для загального добра, повинен найти отклик в других селах, где дороги вымагают конечной направи. Не ждийме на ничею помоч, але возме ся сами за діло, а каждый такой поступок буде одним щеблем в поднесеню культуры нашего села.

Честь вам честны жителі обох Вислоков, Волі Петровой и Буковска, же вы послушали доброй рады в добром ділі члена нашої организации, а другим селам нехай тото ваше велике діло послужит за добрый примір!

ПОМІЩАЙТЕ
ОГОЛОШЕННЯ
В ГАЗЕТІ „ЛЕМКО”

Пренумерата в краю:
30 грошей місячно,
80 „ квартално
1.50 „ полрочно,
3 зл. рочно.
В Америкі: 1 дол. рочно.
В Чехословакии:
2 кор. місячно, 10 кор. полрочно,
20 кор. рочно.
Ціны оголошень:
Ціла сторона 120 зл., ½ стороны 60 зл., ¼ стороны 35 зл.,
1/8 стор. 20 зл., 1/16 стор. 10 зл.;
оголошення малы за 1 мм. 20 гр.,
в тексті 30 гр., перед текстом
40 гр. При місячном и долшом
оголошеню значна знижка.
Контото чекове Нр. 404.155.

До наших Читалень.

Хотячи в календарі „Лемка“ на рік 1937. помістити виказ читалень ім. М. Качковського, руських кооперативов и обществ, просиме заряды всіх читалень прислати редакції Лемка якнайскорше виказы, в котрых належит дати отвiт на слiдуючи питання:

- 1) коли основано читальню ім. М. Качковського?
- 2) килько членов числит читальня?
- 3) килько книжок єст в бібліотеці?
- 4) якы книжки читают члени найохотнійше?
- 5) ци при читальні сут кружки: театральний, спортовий, хор, оркестр, або инши?
- 6) ци читальня має свой дом и якый (мурований, дерев'яний, партероровий, одноповерхний и т. д.)?
- 7) ци и яку діяльність выказує читальня?
- 8) ци єст в селі, яка инша читальня, або товариство? (яка и кто их веде?)
- 9) кто єст в выділі читальні?
- 10) ци єст в селі руський кооператив, якый, килько має членов, як розвиват ся, кто єго провадит, якый доход билянсовый выказал ва 1935 р., якый має настрок?
- 11) ци заходить потреба основаня якого нового общества в селі?
- 12) якы сут найдокучливыи недостатки села (брак школ, дороги, неурегульоване ріки, брак лісов, брак отвiтних ремесленников и т. д.)?

Просиме также присылать до редакции фотографии читальных домов, кооперативов, аматорских кружков, хоров, оркестров и т. д. для помещения в календарі, а также материал с описанием сел, церквей, школ, читалень, кооперативов и домашнего промысла. Особенно цінным матеріалом были бы истории основаня сел на Лемковщині, котры можна найти в старых літописях громадских, приходских и школьных.

Домашна война в Палестыні не устає.

В Палестыні идуť дальше завзяты бои меже жидовским и арабским населеніем. Группы арабских повстанцев нападают на жидовскы колонии и оселі. Жидовскы колонисты организовали самооборону и выставляют каждой ночи варту, котра в разі нападу стрілами будит вооружене населеніе жидовске и взыват до обороны. Одну колонию штурмовали арабы через дві години, жиды однак потрафили удержати ся на своих позициях до часу прибытя англицкой полиции и войска.

Всі арабскы атаки были жидами отперты. Втраты в раненых и убитых сут по обох сторонах.

Под яфскыма воротами в Ерусалимі дошло перед килькома днями до новых боев меже англицком полициом и арабами. Помимо, же всі желізнодорожны торы сут стережены через войско, арабы часто розрывают тор. До Палестыны спроваджают новы отряды войск с Египта.

Комунікация самоходова помимо ескорты панцерных самоходов єст опасна. Серед пустынных горбков арабы уряджают засідки и обстрілюют переїзджаючи караваны, а покаль войскова ескорта потрафит открити огень с машинных карабинов, они счезают.

Недалеко Яффы банда арабов вырубала 3000 помаранчовых дерев належачих до жидов. Власти основали новый концентрационный обоз в Авдза Ель Афир, на пограничу сынайской пустыні, в котром заключают арабских проводыров.

Навоженє лук и пасовиск.

Часто встрічає ся с браком сіна. Под конец зимы видно нераз наших селян, купующих сіно и солому для своего забiдженного статку. При таком способі господаркы мусиме все терпiти бiду, бо зле откормлена живина не може нам дати сподіваных доходов, а понадто мусиме часто, особенно по сухых роках або тырати в осени за безцін живой инвентар, або в зимі выдавати гроши за солому и сіно.

Зарадити той бiді може лем лучша опека над луками и пасовисками. Лукы и пасовиска треба доконче так, як и орны поля, навозити. Каждого року збераме с лук сіно, а нич єй не даєме, тож нич дивного, же лука яловіє и с каждым роком дає штораз меньше травы.

Перший покос быват ище якый—такый, але отавы звычайно на луках не має. По скошенію лук, не опекуєме ся нима и выганяєме на лукы статок. Тото шкодит лукам, бо инши травы роснут на луках, а инши на пасовисках. Лучны травы не любят оскубованя и при выпасанію лук марніють. Прото тыж не треба на скошенных луках пасти живину, а оганяти лукы и косити отаву. Але шобы отава выросла, треба конче по скошенію першой травы луку знавозити, очистити с буряну и в разі посухы наводняти.

Яко навоз наилучше надає ся гнояница, бо она має всі кормовы складники. Гнояницу даєме, в зависимости от розводненя, в количестві 50 до 200 гектолитров на 1 гектар. Розливати гнояницу треба в часі дожджевом, а по крайной мірі, коли єст хмарно и ніт вітру.

У кого ніт гнояницы, того доброго лукового навозу а хоче мати красну отаву, тот мусит знавозити луку по покосі хоць лем скупко азотным навозом, наилучше в формі салитряку, котрый дає ся 100—150 кг. на оден гектар. Тото побудит траву до глубошого закорененя ся и скорого росту, што позволит передержати час посухы, котра часто обнижат другы покосы.

Без такого навоженя трава на луках єст штораз марнійша и планьша, бо рослины добры дичиють и марніють, а их місце занимают бурян и мох. Навожены лукы мають траву добру о высокой кормовой вартости, в виду чого выдаток оплачат ся, бо маме и больше сіна и сіно єст лучше.

Добре єст по знавоженію луку поборонити. Боронами выберат ся с лукы мох и повітре має доступ до землі и до корней трав. В таких случаях навоз высіват ся перед бороненіем и боронит ся зараз по высіанію навозу.

Бурян на луках треба все нищити, аджеж и по скошенію першой травы. Гдекотрый выстарчит выкосити, а инший, як щавій и осетя, треба выкопати.

Где можна, треба лукы в часі посухы поливати водєм. Таким способом придбаєме собі много буйного сіна.

Так як лукы, мусиме также навозити и пасовиска. Найлучши и ту сут азотны на-

возы, бо пасовиско навожене азотом, даст траву богату в білко, котре єст головным кормом живины.

Не треба николи пасти живины по цілом пасовиску. Аж и втєтчас, коли маме мале пасовиско, треба єго поділити на три части и спасати их, одну по другой. По выпасанію одной части, треба ю знавозити, очистити с коровінцов и подкосити бурян и здеревянілу невыпасену траву. Коровінцы роздробляєме и росшмаряєме по пасовиску.

До навоженя пасовиск надає ся также добре гнояница, але в таком случаю можна там пасти живину аж по трох неділях, бо скорше живина не хоче спасати травы, в котрой чує запах своих отходов.

Прото лучше єст навозити пасовиска штучныма навозами (вапневом салитром, або салитряком), бо живина іст охотно траву. Выдаток оплатит ся, бо лучше выдати гроши на навозы, як на сіно и солому, купованы перед весном.

Звірскы методы украинцов.

Серед украинцов восточной Галичины начинают добывати собі право гражданства звірекы способы при переведенію порахунков с политичныма противниками.

В Тучапах (пов. Городок Ягайлонский) украинскы хулиганы вырубали в огороді Василя Журавя 21 овечевых дерев и выбили єму шибы в окнах за того, же он, яко человек руських переконань, вышел с церкви, коли співано там світскы патриотичны украинскы пісні.

В том самом селі зарізано пару коней Николаєви Лабі за того, же вынанял у себе помещеніе для руського кооператива.

Такыма варварскыма средствами воюют украинцы там, где уж опановали частично терен. Ци и на Лемковщині маме допустити до того, шобы рубали нам они овчевы деревья, выбивали шибы и різали коні, а може и нас самых?!

Анти-жидовске движенє в Сирии.

Дамаск (Пат) В Сирии замічат ся штораз сильнійши против-жидовскы движеня. В Дамаскі устроєно ряд против жидовских выступлений. Толпа пробовала освободити арестованых через полицию агитаторов, што допровадило до столкновєня. Килькох жидов и 2-ох полициянтов ранено камєнями. Серед жидовского населєня тоты случаи выкликали панику. Всі skleпы в місті закрыты. Жителі не оставляют своих домов.

Студенты дамаського университета рішили бойкотовати палестынскы товары. Группы студентов ходят по місті и накликують купцов и взагалі ціле населєніе прилучити ся до бойкоту.

Новый плян ивестыцийных работ.

Дня 11. червня на засіданню сеймової комісії выголосил министр финансов, инж. Евген Квятковский бесіду, в котрой высказал, же на час найблизших чотырох літ Правительство предвиджує величезны ивестыцийны работы на загальну суму 1.800 миллионов злотых. Работы тоты начнут ся уж 1. липня т. р. и будут продолжати ся 4 літа. Гроши на тоты работы мають дати всі финансовы жерела и так: финансовы институции, Фонд Труда и державный бюджет. Крім того в другой половині виконання того пляну предвиджує ся также **росписаніе внутренней помичны** ивестыцийной на суму 200 до 300 миллионов злотых.

Поза тым министр заявил, же курс злотового не може быти обниженый, бо лем при стабилизации нашой валюты, можна допровадити до нормализации господарчого положення и запевнити собі спокійну будучность.

ПО ЛЕМКОВЦІНІ.

С. ЧИРНА, пов. Мов.-Санч.

Наше село, колиси належало до скасованого уж пов. грибовского, лежит в барз неприступном місци. Не маме добрых дорог, не маме также своєї русской интеллигенции, прото и истнующая у нас руска читальня Качковского в послідних роках не проявляла жадного житя, што барз зле отбивало ся на воспитанню и освідомленню нашой молодежи. Тепер люды начинают розуміти, што без своєї организации зле єст в селі и тому то выділ нашой чит. скликал на день 1. червня т. р. (на другой день Русалы) обще собраніе членов чит. и запросил близшу интеллигенцию, штобы заохотила людей и молодеж до народной работы и поучила, як тоту работу в чит. провадити.

На собраніе загостили до нас о Стефан Пашкевич с Перунки и делегат О-ва Качковского во Львові, ревизор О. Яновицкий, котры много бесідовали с людми и подали нам добры рады, як треба поставити культурно-просвітительну работу в нашой читальні. Они завозвали собранных до соедененя всіх, без взгляда на религию и до организации под прапором одной русской читальні. Особенно заохочали нашу молодеж до чит. работы в аматорском кружку и хорі.

Видно, што бесіды наших гостей не были даремны, бо сейчас на собраніе вписало ся новых 35 членов, котры зложили вписового и членск. взноса зл. 15.50.

До нового выділа выбрано: председателем — Григория Федорчака, заст. председателем — Осифа Ляша, секретарем — Осифа Поруділдо, касиєром — Петра Папача, библиотекарем — Николая Папача с. Василия, заступниками: Тимофея Мациєвского и Николая Ляша. До контр. комиссии: Теодора Папача, Павла Федорчака и Михаила Бодневича.

Собраніе приняло новый статут О-ва. Рішено выписати веце газет до чит., звернути ся до наших Обществ и о. Павлишина о пожертвованіе книжок для читальні и оголошеня читальняні поміщати в „Лемку“ и „Землі и Волі“. Поручено также новому выділову в порозумленію с солтысом выстарати ся о пляц под будову чит. дому, при переведенію комасации. Рішено скли-

кати отдільне торжественне собраніе членов и гостей и просити загостити до нас руску интеллигенцию с Криницы и Горлицкого и читальняну оркестру с Тылича. Собраніе закончило ся о год. 6.30 веч. Маме надію, што новый выділ попровадит нашу чит. добре, а наша молодеж наконец, зрозуміє потребу трудити ся для нашего добра в своєї русской чит. и охотно запише ся до аматорского кружка и хору.

Ми, чирнаняне, повинни зрозуміти, што лем культура и просвіщеніе дадут нам ліпшу долю. Наше село под взглядом культуральным не уступат сусідним селам, але світ поступат с каждым днем вперед, прото и нам не можна заложити руки, лем користати с чит. библиотеки, читати полезны книжки и с них наберати ума-розна. Для выміны слов, для розбудженя охоты до читаня—просиме нашу доокрестну интеллигенцию заглядати частійше до нас!

Присутный.

СНІТНИЦА, пов. Горлицы.

Село наше єст розділене религийно на дві части: одну третю часть составляют унияты, дві части православны. До недавна униятскими священниками были украинцы, як о. Жук, о. Швед и др. Тоты два старали ся за всяку ціну насадити нам свою украинску идею, але надармо, село як было так и остало ся руским. Тот роздор, котрый вносили своим политыком названы висше „панвітки“, отбил ся барз зле на русской культурно-просвітительной и экономической работі в селі. Был у нас русский кооператив, але не было своего интеллигентаруководителя и счасом sklep упал. Маме также и читальню, але завдякы тым егомостям, читальня не проявляла житя-спала. Зато барз красно розвивают ся у нас жиловскы skleпы и шинкы. Наши руснакы все там сидили. Наконец пришло а в нашом селі до змін. Православны мають руского священника-галичанина и унияты по долгих літах дождали ся также діятельного русского егомостя. Заворушили ся наши руснакы и начали знова думати, як бы оживити наше читальняне житіє.

Дня 31. мая т. р. скликано Обще Собраніе членов, на котре пришли и свои и чужі гости. Были там місцевы священники и представителі нашой интеллигенции як: Теодор

Войтович, Николай Юрковский и делегат О-ва Качковского рев. О. Яновицкий.

Так місцевы священники як и делегаты однодушно призывали наших людей до об'єднаня в читальні и до организации под прапором О-ва Качковского и до начатя полезной работы в читальні.

В результаті-на собраніе вписало ся 38 новых членов, котры вплатили членский взнос и вписове, приняли новый статут О-ва и выбрали новый выділ читальні, а именно: председателем—о. К. Короля, заст. председателем—Софрона Крыницкого, сына Захара, библиотекарем—Стефана Ставиского и заступниками—Ваня Матійчака и Ваня Ставиского, сына Стефана. До контр. комиссии: о. Теодосия Минчакевича, Ваня Кузмича и Константина Хомяка.

В часі собраня хор под дырыгентуром о. Минчакевича проспівал барз красні много народных пісень.

Мы, руснакы, маме тепер надежду, што при об'єднаніи наших людей под прапором читальні и при помочи нашой русской интеллигенции наша читальня отжиє и при помочи наших священников, жертвовавших свой труд над вышколеніем хора и заложеніем аматорского кружка за оден рок нашу чит. не познают чужі люды—гости. Добре было бы, если бы новый Виділ чит. сорганизовал при чит. садок овочевых дерев, для нашего селянства, што поднесло бы доходы с господарств. Снітница має добрый климат для овочевых дерев и яко положена недалеко Крыницы має также добрый рынок продажи овочей.

Здала бы ся нам также молочарня, або sklep русского кружка рольничого. Если бы мы мали такой sklep, то наши люды не мали бы жадного претекста ходити до жидов и там по ночах сидити.

В добрый час снітничане, берте ся до доброй работы, вшитко зле шмаріє, а увидите, што ваш труд на народной ниві даст добры овочи. Будте добрым приміром для околичных сел, в котрых нїт ище читальень им. М. Качковского. Тоты села напевно, коли увидят добры результаты вашой читальняной работы и коли переконают ся, же у вас поднесла ся тверезость и моральность, не схотят дати выпередити ся и основуют и у себе читальні того-же имени. Тож счастье вам Боже в добром труді.

Доброжелатель.

Д-р мед. Єраст М. Константинович

б. асыстент Держ. Шпиталя св. Лазаря в Кракові

ординус от 1. червня с. р.

в Мушині

ул. Пилсудского Нр. 93

(дом г. Фр. Сикорского).

Што чути в світі.

Рим: До Риму приїхав маршал Бадоліо, вицекороль Абисинії. Населення Італії урядило велику манифестацію в честь побідителя в війні з Абисинією.

Нанкін: Китайське правительство оголосило закон, котрий предвиджує кару смерті за курення опію і то для загалу населення по третій рецедиві, а для урядників, студентів і професорів уж по першій рецедиві. Як відомо, опію єсть сильном отруєм, котра нищить волю і організм чоловіка. Приймаєть ся опію так, же курить ся листя спеціального гатунку маку, містячого в собі тоту опасну отрую. По выкурению файки опію, попадаєть ся в сон, в котром маєть ся чудны сны. Кто раз попробує той отруи, тот уж не може жити без ней і за файку опію готов убити аж і близких сердцу людей. Прото тиж правительства всіх держав приміняють за курення опію высокі кары, а в Кытаю, где ужите опію єсть сильно роспространене, грозить за курення опію кара смерті.

Вашингтон: През. Рузвельт подписав закон о кредитах, перезначеных на вооруженіє в сумі перешло 1-го миллиарда долларов. Єсть то рекордова сума в мирных часах.

В амерыканских вьзницах впали на добрый помысл, а именно: в часі голодовых штрайков не примушают никого до їдла, лем под дверми кель смажат мясо, котрого запах доходить до комнат и вырабат змак у штрайкуючих арестантов.

Парыж: Премьер нового правительства во Франции Л. Блюм (социалист) заповів в палаті депутатів безотложну реализацию важных политичных, общественных и экономических реформ.

Перше засіданє в палаті депутатів было сильно бурливе. Консервативный посол Ваят сказав, же перший раз в истории Франции случает ся, же жид стає во главі правительства. По бурливой демонстрации председатель заявил, што во Франции ит католиков и жидов, а сут лем французы. Палата ухвалила довіре новому правительству 348 голосами против 210.

Льондон: Негус, котрый тепер жиє в Льондоні и котрому не повела ся мисия, наміряєть навязати переговоры с Муссолиним. Хочє он цілковито поддати ся под власть и протекторат Італії, лем бодай удержати ся при короні.

Льондон: Заряджена правительством Кантонским мобилизация в полудневом Кытаю, не означат начатя военных кроков против Японии, бо правительство здає собі справу, же война закончила бы ся поражением Кытая. Кантонское правительство хочє лем через тоту мобилизацию заманифестовати против Японии и тым самым утруднити положенє кытайского центрального правительства.

Женева: Сесия Рады Лиги Народов отбудєть ся 26. червня а собранє цілой Лиги Народов дня 30. червня т. р.

Москва: Совітскы газеты подают, же

новая советская конституция будет наиболее демократична на цілом світі. По случаю оголошения той конституции в С. С. С. Р. має быти оголошена также частична амнистия, котра обойме всіх засужденых в административной дорозі, а также гдекотры категории политичных преступников.

Ерусалим: Арабскы предводители выслали до правительства ультиматум, жадаючи принятия арабских постулатов до 10 дней, грозячи в противном разі, же будут дальше штрайковать.

До Букареста приїхали в минувшом тыждні регент Югославии, князь Павел и президент Чехословакии, Д-р Бенеш. Газеты привязуют до той встрічи историчное значенє.

На торжестві, устроєном с okazji рочницы поступления на королевский престол Кароля II. в присутствии князя Павла и през. Бенеша послідовала страшна катастрофа. Трыбуна, на котрой находило ся около 3000 людей, завалила ся. 24-ро люда нашло смерть на місци, а понад 800 єсть тяжело раненых. Комисия ствердила, же причиною катастрофы была дрантива будова трыбун и же дано планый материал.

Білград. В Дубровнику упав в середині міста войсковый самолет. При удареню о дом послідовала експлозия резервуара и запалена бензина брызнула на толпы переходячого населения. Троє людей спалило ся на місци, а 13-ро страшно попареных перевезено до шпиталю. Дом, на котрый упав самолет, спалил ся.

В Америкі вырабають для электричных инсталляций гвозди с наперу, подданого тиснению кольосальных гидравлических прас.

Рим: Дня 9. червня послідовала в Італії частична реконструкция правительства. Муссолини, котрый от січня 1935 р. был министром заграничных, внутренних, военных и колонийных діл, зрек ся тых министерств. Министром заграничных діл заименовано зятя Муссолини'ого гр. Чиано.

С Кытая доносят, же 3 кантонскы дивизии начали марш на Нанкин. Чанг-Каи-Шенг выдал правительственным войскам приказ цофнути ся, штобы не допустити до боя с тьма дивизиями.

Каир. Около міста Лыда в Палестині охоронный поїзд, высланный перед поїздом транспортуючим войско и везущий лем балласт, вылетіл в воздух.

Берно: Швайцарская народная Рада высказала ся 96 голосами против 72 против навязаню дипломатических отношений с Советами.

Рим: Маршал Бадоліо уступил титул вицекороля Абисинии, а одержал титул князя Аддис-Абебы. Титул вицекороля Абисинии надано маршалу Грацияни.

Вісти с краю.

Варшава: Дня 6. червня выїхал с Варшавы по 8. роках побыта папский нунций, кардинал Мармаджжи. При отїзді с Варшавы попрощали єго: священство, дипломатия и правительственные круги.

Варшава: П. А. Т. комуникує в звязи со штрайком будовельных работников в Гдыні, же были случаи, же штрайкуючи работники нападали на робячих. В обороні робячих работников станула полиция и в схватці со штрайкуючими ранено килькох демонстрантов. Полиция росогнала демонстрантов, привернула порядок, а также арестовала килькох агитаторов.

Варшава: Амбулатора Р. П. в Парыжі Хлаповского освобождено с занимаемого stanowiska, а на єго місце заименовано до теперешного амбулатора в Москві Лукасевича. Зміну тоту переведено со взгляда на лівый характер нового французского правительства.

Новый Санч: Воевода плк. Гноинский удєкоровал в имени Президента Р. П. Марию Перацку золотым крестом заслуги, наданным за полезну общественну роботу. При том торжестві присутствовали вице-воевода д-р Малашинский, староста Д-р Лях, председатель Апеляц. Суда Д-р Парылевич и др.

В Торуню 8.VI. в часі демонстрации 1500 работников дошло до кривавой схватки с полициом. С толпы на полицию, котра заступила дорогу демонстрантам, посыпали ся цеглы и камені, а кромі того дано килько револьверовых выстрілов, на што полиция отвітала поодинокими стрілами. Убито двоє люда, а двоє ранено.

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ

ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО,

НЕХАЙ ЯКНАЙСКОРШЕ

заасєкурує ся
в асєкурацийном Товаристві
ВИТА И КРАКОВСКЕ
во ЛЬВОВІ

Асєкурацию принимают на цілой Лемковщині
представителі: гг. Осиф Яновицкий — Крыница-Село и Михаил Перелом — Сянок.